



Ketika ini, masih ada PMKS yang berdepan dengan masalah kewangan, modal pusingan dan tenaga kerja yang menyebabkan operasi perniagaan agak terjejas dalam fasa endemik kini. – Gambar hiasan

#### MPN pandang serius masalah PMKS

- Oleh NUR HUDA MUSA

PETALING JAYA – Majlis Pemulihan Negara (MPN) memandang serius situasi ekonomi global dan domestik pasca-pandemik Covid- 19 dan kesannya ke atas negara dan rakyat.

Ahli MPN, Datuk Michael Kang berkata, pengusaha Perusahaan Mikro, Kecil dan Sederhana (PMKS) merupakan antara yang paling terjejas akibat pandemik ini dan isu berkaitan PMKS sering kali dibincangkan di mesyuarat-mesyuarat MPN.

Beliau berkata, antara isu yang selalu dibangkitkan oleh pengusaha PMKS adalah masalah kekurangan tenaga kerja asing dalam pelbagai sektor terutamanya perladangan yang dilaporkan mengalami kerugian hampir RM20 bilion pada tahun 2021.

“PMKS di negara ini sedang menghadapi kesukaran antaranya berkaitan kekurangan tenaga kerja dan aliran kewangan yang kritikal.

“MPN berperanan membawa suara PMKS yang amat terjejas dan memerlukan pertolongan daripada pihak kerajaan dari segi kemudahan untuk mendapatkan tenaga kerja asing serta bantuan kewangan,” katanya ketika ditemui pemberita baru-baru ini.

Michael berkata, antara perkara yang perlu diberi keutamaan adalah mewujudkan satu polisi khas bagi memastikan PMKS boleh bangkit semula dan membantu merencanakan ekonomi negara.